



REPUBLIKA E SHQIPËRISË
ENTI RREGULATOR I ENERGJISË
BORDI

VENDIM

Nr. 37, Datë 10.02.2025

MBI

SHQYRTIMIN E KËRKESËS PËR RISHIKIMIN E VENDIMIT TË BORDIT TË ERE
NR. 302 DATE 30.12.2024

Në mbështetje të nenit 16 të ligjit nr. 43/2015 “Për sektorin e energjisë elektrike”, i ndryshuar; neneve 44, dhe 144 të ligjit nr. 44/2015 “Kodi i Procedurave Administrative të Republikës së Shqipërisë”; si dhe neneve 15 dhe 16 të Rregullores për organizimin, funksionimin dhe procedurat e ERE-s, miratuar me vendimin e bordit të Entit Rregullator të Energjisë (ERE) nr. 96, datë 17.06.2016; Bordi i ERE-s, në mbledhjen e tij të datës 10.02.2025, mbasi shqyrtoi relacionin me nr. 483 prot., datë 28.01.2025, të Drejtorisë Juridike dhe Zgjidhjes së Mosmarrëveshjeve “Mbi shqyrtimin e kërkesës për rishikimin e vendimit të bordit të ERE nr. 302, datë 30.12.2024 “Mbi shqyrtimin e propozimit të FTL sh.a.për draft “Marrëveshjen për blerjen e energjisë elektrike ndërmjet Furnizuesit të Tregut të Lire SH.A. dhe prodhuesve me Përparësi të energjisë”,

Konstatoi se:

- Bordi i ERE-s, me vendimin nr. 302, datë 30.12.2024, vendosi: 1. Pranimin e pjesshëm të kërkesës për shqyrtimin e draft-it të “Marrëveshjes tip për blerjen e energjisë elektrike ndërmjet Furnizuesit të Tregut të Lirë sh.a. dhe Prodhuesve me Përparësi të Energjisë” 2. Fillimin e procedurës për disa ndryshime në “Marrëveshjes tip për blerjen e energjisë elektrike ndërmjet Furnizuesit të Tregut të Lirë sh.a. dhe Prodhuesve me Përparësi të Energjisë”.
- Furnizuesi i Tregut të Lirë (FTL) sh.a. ka paraqitur një kërkesë nëpërmjet shkresës nr. 3731/2 prot., datë 06.01.2025, dhe shkresës nr. 3731/3 prot., datë 14.01.2025, duke kërkuar, fillimisht, informacion mbi dispozitivin e vendimit të bordit të ERE-së nr. 302, datë 30.12.2024, dhe më pas, rishikimin e këtij vendimi dhe nisjen e procedurës për ndryshimin e Marrëveshjes Tip për Blerjen e Energjisë Elektrike ndërmjet Furnizuesit të Tregut të Lirë sh.a. dhe Prodhuesve me Përparësi të Energjisë Elektrike, sipas propozimeve të saj.
- Në bazë të nenit 16, pika 5, të ligjit nr. 43/2015, “Për sektorin e energjisë elektrike”, i ndryshuar, nenit 33, pika 1, gërma “b” të “Kodit të Procedurave Administrative të Republikës së Shqipërisë” dhe nenit 16 të “Rregullores për Organizimin, Funksionimin dhe Procedurat e ERE-s”, miratuar me vendimin e bordit të ERE-s nr. 96/2016, shoqëria FTL sh.a. është

aktualisht pjesë e një procesi shqyrtimi nga ERE dhe, për këtë arsye, legjitimohet si palë kërkuese në përputhje me legjislacionin dhe rregulloret në fuqi.

- Shoqëria FTL sh.a. ka përmbushur edhe kushtin e afatit 7 ditor për paraqitjen e kërkesës për rishikim, pasi ka marrë djeni mbi vendimin nr. 302/2024 të mbledhjes së datës 30.12.2024, siç është referuar në shkresën e saj nr. 3731/2 prot., datë 06.01.2025, dhe ka paraqitur kërkesën për rishikim nëpërmjet shkresës nr. 3731/3 prot., datë 14.01.2025, në përputhje me nenin 104, pika 1, të “Kodit të Procedurave Administrative”.
- Shoqëria FTL sh.a., në kërkesën për rishikimin e vendimmarrjes së sipërcituar, ka provuar dhe argumentuar se; *riformulimi i nenit 4 të marrëveshjes është bërë për të përcaktuar qartë përgjegjësitë e Shitësit, në përputhje me praktikën më të mirë të industrisë dhe legjislacionin në fuqi. Përcaktimi i qartë i afateve për dërgimin e parashikimeve dhe programeve të prodhimit është i nevojshëm për të garantuar përmbushjen e detyrimeve të FTL sh.a., ndaj Operatorëve të Rrjetit dhe marrëdhënieve kontraktuale me aktorët e tjerë të tregut. Për më tepër, duke pasur parasysh se prodhuesit me përparësi të energjisë elektrike mbulojnë kostot e disbalancave dhe nuk janë të detyruar të dërgojnë programe të sakta, FTL sh.a. vlerëson si të domosdoshme sigurimin e informacionit mbi disponueshmërinë teknike të impianteve prodhuese, në mënyrë që të përmirësojë parashikimet dhe të minimizojë gabimet, një praktikë e njohur gjerësisht në industrinë e energjisë.*
- Për sa argumentuar, vlerësojmë se shoqëria FTL sh.a., ka provuar domosdoshmërinë e rishikimit të pikës 2 të vendimit nr. 302/2024, duke theksuar rëndësinë e: (i) përcaktimit të qartë të afateve për dërgimin e parashikimeve dhe programeve të prodhimit, dhe (ii) sigurimit të mekanizmave për përmirësimin e programeve të parashikimit dhe minimizimin e gabimeve nga ana e FTL sh.a. Këto problematika janë adresuar në nenin 4, pika 4.1; 4.2; 4.3; 4.3.1; 4.4; 4.4.1; 4.42; 4.5, përfshirë dhe klauzolat e parashikuara në neni 5, dhe për këtë arsye është vlerësuar që vendimi të rishikohet për këtë pjesë.
- Në lidhje me pjesën tjetër të kërkesës së shoqërisë FTL sh.a., për rishikimin e vendimit nr. 302/2024, vlerësojmë se në shkresën e dërguar nuk janë paraqitur apo argumentuar prova të reja përveç atyre të parashtruara më herët, që mund të përbëjnë bazë për rishikimin e vendimmarrjes lidhur me fillimin e procedurave.
- Gjithashtu, është marrë në konsideratë se disa ndryshime në draft-marrëveshjen e propozuar përfshijnë përmirësime gjuhësore, saktësime të afateve dhe përditësime të bazës ligjore, të cilat nuk ndikojnë në thelbin e kontratës së miratuar më herët nga ERE. Për këtë arsye, këto ndryshime janë vlerësuar si të panevojshme për t'u përfshirë në procedurën për shqyrtimin e kontratës tip, objekt i vendimit nr. 302, datë 30.12.2024.

- Në nenin 113 të ligjit nr. 44/2015 “Kodi i Procedurave Administrative i Republikës së Shqipërisë” është parashikuar mundësia e ndryshimit të një akti, me nismën e vetë organit që e ka nxjerrë, duke përcaktuar dhe formën ligjore të këtij ndryshimi të aktit, e cila duhet të bëhet me një akt të ri me shkrim.
- Duke marrë në konsideratë propozimet dhe argumentet e sipërpërmendura, si dhe duke garantuar transparencën dhe gjithë përfshirjen në vendimmarrje, vlerësojmë pranimin e e pjesshëm të kërkesës për rishikimin e vendimit të Bordit të ERE-s nr. 302/2024 dhe përfshirjen në procesin e konsultimeve të këtyre ndryshimeve. Gjithashtu, këto ndryshime do të jenë pjesë e vendimmarrjes përfundimtare nga ana e ERE-s, pas përfundimit të procesit të konsultimeve publike me palët e interesit.

Për gjithë sa më sipër, bordi i ERE-s,

Vendosi:

1. Pika 2 e vendimit të bordit të ERE nr. 302, datë 30.12.2024, ndryshohet/shtohet me paragrafët (ii) dhe (iii), me përmbajtjen si më poshtë, ndërsa pjesa tjetër e vendimit mbetet e pandryshuar.

- (ii) Neni 4, me titull “Programet e Livrimit dhe Remontet”, pikat 4.1; 4.2; 4.3; 4.3.1; 4.4; 4.4.1; 4.4.2 ; dhe pika 4.5, ku parashikohet si vijon:

4.1. Shitësi i vendos në dispozicion blerësit parashikimet dhe programet e prodhimit në terma afatgjatë dhe afatshkurtër dhe siguron blerësin që ato janë në përputhje me praktikën më të mira të industrisë dhe legjislacionin e zbatueshëm.

4.2. Shitësi vendos në dispozicion të Blerësit parashikimet dhe programet e prodhimit si më poshtë:

- a) *Jo më vonë se data 1 (një) Gusht e vitit aktual, parashikimin vjetor me bazë mujore të prodhimit të energjisë elektrike për vitin pasardhës;*
- b) *Jo më vonë se 1 javë para fillimit të secilit muaj, parashikimin mujor të prodhimit të energjisë elektrike;*
- c) *Jo më vonë se çdo ditë të mërkurë të secilës javë, për javën pasardhëse, parashikimin javor të energjisë elektrike;*

Shitësi, për çdo ndryshim nga parashikimet e mësipërme, duhet të njoftojë blerësin në përputhje me Kodet e Rrjetit dhe rregullat përkatëse.

4.3. Shitësi që ka përzgjedhur të jetë pjesë e grupit të balancimit duhet të deklarojë programin e prodhimit për çdo periudhë të shlyerjes së disbalancave, për ditën në avancë D-1...[....].

4.3.1. Shitësi, që nuk ka deklaruar programin e prodhimit në përputhje me pikën 4.3 të këtij neni, duhet të njoftojë blerësin jo më vonë se ora 09:00 AM të ditës paraprake D-1, për ditën D, lidhur me disponueshmërinë teknike (nëse ka kufizime) të impiantit prodhues, sipas aneksit, i cili është pjesë integrale e kësaj marrëveshjeje, si dhe programin e remonteve apo ndërhyrjeve të tjera që mund të ndikojnë në prodhimin e energjisë elektrike. Çdo ndryshim në disponueshmërinë teknike të impiantit prodhues duhet t'i njoftohet menjëherë blerësit.

4.3.2. Në rast se pjesëmarrësi i grupit të balancimit dështon në dërgimin e programit/skedulit të prodhimit të energjisë elektrike, atëherë parashikimi i programimit për pjesëmarrësin e grupit të balancimit do të bëhet nga lideri i balancimit të grupit të balancimit të Blerësit.

4.4. Shitësi, që ka përzgjedhur të mos jetë pjesë e grupit të balancimit të Blerësit, duhet t'i deklarojë Blerësit, brenda orës 09:00 AM të ditës D-1 për ditën D, programin e prodhimit për çdo periudhë shlyerjeje të disbalancave, bazuar në rregullat e tregut shqiptar të balancimit të energjisë elektrike.

4.4.1. Blerësi nuk do të pranojë asnjë program të ri apo të ndryshuar për ditën D, në D-1 dhe në D, qoftë një ditë më parë apo brenda së njëjtës ditë, nëse është deklaruar pas afatit të mësipërm. Kjo përfshin, por nuk kufizohet vetëm te ndonjë program i dërguar brenda afateve kohore të tregut të energjisë elektrike brenda së njëjtës ditë.

4.4.2. Në rast se Shitësi nuk e deklaron programin e ditës në avancë Blerësit, sipas përcaktimeve të pikës 4.4, atëherë programi që do të konsiderohet i nominuar dhe mbi të cilin operatori i sistemit të transmetimit do të përlllogarisë disbalancat do të jetë (0) zero.

4.5. Shitësi i vendos në dispozicion Blerësit programin e remonteve apo ndërhyrjeve të tjera, të miratuara nga operatorët e rrjetit, të cilat mund të ndikojnë në prodhimin e energjisë elektrike.

(iii) Neni 5, me titull “Shitja e Energjisë Elektrike në treg të Lirë”, parashikohet si vijon:

5.1. Shitësi ka të drejtë të tregtojë të gjithë energjinë e prodhuar nga impianti gjenerues në tregun e lirë, me kusht që:

- Brenda datës 1 (një) Gusht të vitit aktual, të informojë Blerësin se e gjithë energjia e prodhuar për vitin pasardhës do të tregtohet në tregun e lirë.
- Periudha minimale gjatë të cilës Shitësi mund të shesë energjinë elektrike në tregun e lirë është 1 vit.
- Nuk do të jetë pjesë e grupit të balancimit të Blerësit, për periudhën e tregtimit në tregun e lirë.

5.2. Brenda datës 1 Gusht të vitit në të cilin Shitësi shet në treg të lirë, duhet të njoftojë Blerësin për vijimësinë e shitjes në treg të lirë për vitin pasardhës. Në rast se Shitësi nuk njofton për vijimësinë, konsiderohet që energjia e prodhuar prej tij do t'i shitet Blerësit.

5.3. Tregtimi i energjisë elektrike të prodhuar nga impianti gjenerues në tregun e lirë, sipas parashikimeve të këtij neni, nuk pezullon afatin e kësaj marrëveshjeje.

2. Drejtoria Juridike dhe Zgjidhjes së Mosmarrëveshjeve, të njoftojë shoqërinë “Furnizuesi i Tregut të Lirë” sh.a., Ministrinë e Infrastrukturës dhe Energjisë si dhe palët e interesit për vendimin e bordit të ERE-s.

Ky vendim hyn në fuqi menjëherë.

Çdo palë e përfshirë në këtë procedurë mund t'i kërkojë ERE-s, brenda 7 ditëve kalendarike nga data e marrjes së vendimit, rishikimin e vendimit të bordit në rast se ka siguruar prova të reja që mund ta çojnë bordin në marrjen e një vendimi të ndryshëm nga i mëparshmi apo për gabime materiale të konstatuara. Për këtë vendim mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETARI

Petrit AHMETI

**NË MUNGESË DHE ME URDHËR
ANËTAR I BORDIT TË ERE
Erjola SADUSHI**